

Den Ambiente



JAN POETS

Ta Desea Henter Pueblo Di Aruba Un Feliz Dia Di Himno Y Bandera

Entrevista exclusivo cu Rufo Odor...

MI KIER PA TUR HENDE SINTA PENSA E SIMBOLO DI HIMNO Y BANDERA

**** Ayera nochi e coro "CANTA ARUBA" bao direccion di e maestro Rufo Odor a organisa un concierto en coneccion cu DIA DI HIMNO Y BANDERA. Esaki a tuma lugar na Sta. Anna school na Noord, na unda mas cu 300 mucha a canta un cantica componde pa e maestro Rufo Odor.**

Tambe durante e concierto tabata tin presentacionnan di e grupo di coronan Canto Aruba, The Melodics, Grupo Alegre, Cos di Mucha y Coro Maria Goretti.

Pa awenochi e fabuloso concierto aki lo continua na San Nicolaas den John Wesley Auditorium pa 8 or di anochi. Ta ser spera un multitud grandisimo pa e fantastico concierto aki.

DEN AMBIENTE a logra un entrevista cu e incansable maestro di canto, kende ketu bay ta cosechando exitonan grandi cu su dos grupo di canto, "Canta Aruba" y "Vivons & Chantant".

Rufo a cuminsa ta conta cu "Canta Aruba" a ser funda pa su persona dia 10 di Oktober na aña 1991. E grupo a ser funda pa Rufo despues di un exitoso presentacion den Cas di Cultura.

"Canta Aruba" na prome instante tabata un grupo di 16 persona cu tabata tuma les di canto serca Rufo Odor. Despues di 11 luna di les, Rufo a dicidi di laga e grupo presenta dilanti un publico, cual a tuma lugar den Cas di Cultura.

E presentacion tabata asina exitoso, cu e demandanan a cuminsa ta drenta pa mas presentacion. Rufo mirando e acohida asina grandi, a dicidi conhuntamente cu e grupo pa keda hunto, y sigui duna presentacionnan publico.

For di e tempo ey "Canta Aruba" ta cosechando exitonan tras di exitonan. E popularidad di e grupo a extende te den exterior, na unda nan a ser invita pa representa Aruba.

Rufo ta sumamente satisfecho cu su grupo "Canta Aruba", pa e reaccionnan positivo cu nan a sa di ricibi riba terenonan internacional. Aña pasa na Corsow durante e festival internacional "Canta Aruba" a haya hopi reaccionnan positivo, na unda nan a impressiona paisnan manera Venezuelay Jamaica cu nan calidad di canto.

Pa chiquito cu nan grupo tabata entre e demas paisnan, "Canta Aruba" tabata duna un volumen di canto, pa cual hopi hende a keda asombra cu un grupo asina chiquito por a duna un volumen di voz asina grandi. **VIVONS & CHANTANT.**

Tambe Rufo ta dirigi e grupo di canto "Vivons & Chantant". E grupo aki ta bayendo den su 40 aña di existencia. E grupo aki su edadnan ta varia entre 30 pa 60 aña.

"Vivon" & "Chantant" tambe a representa Aruba den varios ocasion den exte-

rior. Paisnan cu nan a cosecha exitonan grandi tabata: Bonaire, Corsow, Saba, St. Maarten, Venezuela, Republica Dominicana, Costa Rica, Brasil y Mexico.

"Vivons & Chantant" ta canta tur sorto di genero musica, manera musica clasico, semi-clasico, popular, negro spiritual etc.

Rufo ta enseña cu "Vivons & Chantant" riba diamars entre 8 or pa 10 or, y cu "Canta Aruba" riba diahuebs di 7 or pa 8 or y mei.

Actualmente Rufo ta gozando di su pension bon mereci, despues di a eherce e labor importante como maestro di school na La Salle Colege y Colegio Arubano. Napalasio di corte Rufo ta traha freelance como inerperte. Tambe Rufo ta miembro di e comision pa estudionan di papiamento.

Rufo tin su punto di vista encuanto e diferencia di canto di ayera y awendia. Pero debi cu e topico ta asina interesante y valioso, **DEN AMBIENTE** lo bin cu un reportahe mas amplio cu e entrevista aki realisa cu e gran maestro Rufo, kende sa exactamente kiko ta papia y come pa loke ta trata canto.

Rufo su mensahe pa nos gran dia di **HIMNO Y BANDERA** ta: **"lo mi kier pa tur hende sinta pensa kiko ta e berdadero valor di e simbolonan aki"**

Rufo ta desea henter pueblo di Aruba un feliz dia di **HIMNO Y BANDERA**.



MANIFESTACION CULTURAL DIADOMINGO Ariba PLAZA BETICO CROES...

**** Celebracion di Nos Dia Nacional, Dia di Himno y Bandera lo tuma lugar durante henter e fin di siman aki cu eventonan den tur barionan ariba nos isla.**

Esaki ta demostra e amor grandi cu nos hendenan tin pa nos simbolonan di union y identidad esta Himno, Bandera y Escudo.

Comision Himno y Bandera den nomber di Gobierno di Aruba ta organisa un manifestacion cultural Diadomingo 19 di Maart cuminsando pa 6 or di atardi ariba Plaza Libertador Betico Croes.

Lo tin presentacion di Los

Duques, Connor Steelband, De Trupialen, Francie y su Super Dancers, Joselito Geerman, Simandanza, Sulaike Croes, Placentero Ritmo y Cuerde, Popcorn Dancers, Amy Lasten, declamacion di Arlene Marsdin y Belen Kock-Marchena, Erika Giel y pa finalisa Victor Camacho y Padu del Caribe lo toca hunto ariba un piano cancionnan di Rufo Wever.

Esaki ta algo unico, pues tur hende ta ser invita pa bin presencia e show cultural Diadomingo awor ariba Plaza Libertador Betico Croes.